

## 若知著袂災

(上台行禮)

甲：比賽就已經來開始，看你頭敲敲，是咧想啥物？

乙：「頭頂水湧，下跤火燒，好空無份，苦難攏著」。

甲：這是~謎猜嘛！

乙：嘿啦！鬥想一下啦！看你知抑是毋知。

甲：「災」

乙：「知」毋著講。

甲：阿著「災」矣。

乙：「知」毋著緊講，啊~我看是無毛雞假大格毋知~講知~。

甲：我就講「災」，是災厄的「災」。

乙：鳴~是災厄的「災」，毋是知影的「知」喔。

甲：真正是人若呆看面就會知。

乙：按怎講是「災」。

甲：你看「災」的頂半爿是「水」，下跤爿是「火」。人攏講水火無情，  
「水」佻「火」鬥做伙定著無好代誌，干焦會帶來災難，所以是  
「災」。

乙：ê~有理喔！烏斫仔貯豆油-看袂出你閣真厲害，一下仔著臆出來，  
講著「災」你敢有感覺近年來災厄攏真嚴重，親像講風颱。

甲：有影呢「起厝動千工，拆厝一陣風」，一下著攏去了了。

乙：佳哉攏無啥物死傷。

甲：有命著有福，所以講咱著愛有預防，咱的生活才會快樂。

乙：預防喔！啊！我知我知，有燒香，有保庇；有食藥，有元氣。

甲：著啦！有預防才袂「半暝報贏繳，天光報吊投」。

乙：若是按呢風颱欲來矣，咱是欲按怎來預防。

甲：若是知影風颱欲來，愛注意電視、廣播的氣象報告、抑是敲「166」、

「167」的電話來知影風颭的消息。

乙：「166」、「167」，氣象局嘛是真慎重，電話一枝箸~會通，抑著攢兩枝~予人損。

甲：彼是因為咱台灣是多元化的國家，講華語的人會使利用「166」專線來查詢，講台語、客語、英語的人會使利用「167」專線來查詢。

乙：氣象局實在是十二月芥菜—真有心。

甲：閣有，風颭天毋通去 山、爽溪仔水，看海漲、釣魚，遮的攞是真危險的代誌。

乙：總共一句就是颭風若是欲來，著愛乖乖佇厝內（tshāi）。

甲：歸樣好好—無錯，厝內嘛愛攢手電仔火、水以防停電、停水；門窗巡巡咧，毋通予風吹開。

乙：我知，厝外懸的物件，愛剝落來抑是釘予調，避免予風吹落來去傷著人，水溝仔嘛愛清清咧，較袂積水。

甲：恩主公飲燒酒，看不出來你抑知。

乙：老師捌講過！樹頭倚予在，毋驚樹尾做風颭。

甲：老師講的你有認真聽，換你來講予阮聽，火燒厝的時陣，是欲按怎來逃命。

乙：先「救火」閣來「報警」了後「逃命」。

甲：你毋先生節脈—罔講，啥人毋知這三種。

乙：你知喔！你毋尻川夾火金姑—佯生。

甲：我知，台跤的觀眾朋友無一定就知，所以請你講詳細。

乙：講就講，澎湖菜瓜—十唸。代先先救火，救火上重要是火猶未滾開，趕緊提附近的拍火機、消防栓（sng）來拍火。

甲：若是附近無拍火的物件咧。

乙：會使利用棉被、布簾仔（lī）搵水搵~予澹來拍火，若是無法度救火就趕緊報警。

甲：按怎報警。

乙：敲 119，予拍火兄弟共你救，地址要講詳細，才袂耽誤救火時間，  
大聲喝叫火燒厝矣予其他的人知影通逃命。

甲：ê～無底看你閣知

乙：閣有，較輸火浞真緊、真焰，四界攏是煙霧，著利用面巾抑是手  
巾仔，搵水掩鼻仔恰喙，用爬，循著避難路線逃命去安全的所在。

甲：是啦！防災觀念咱若知，減少逐家的傷害。

乙：平安幸福自然來，人人安全笑哈哈。

合：笑哈哈，多謝逐家。